


Clifford Rosa, Presidente di Fundacion Rancho:

E forno di kalki ta den e curazon di Oranjestad como un monumento industrial hopi importante

**Pero adictonan, sushedad y vandalismo ta e problema!*



ORANJESTAD (AAN) – Den entrevista cu DIARIO, Clifford Rosa, Presidente di Stichting Rancho, el a menciona cu na April venidero Fundacion Rancho ta cumpli 13 aña di a wordo lanta.

Di e transcurso aki e ta gradici 10 aña cu Aruba Doet y CedeAruba cu e fundacion ta haya un dia cu boluntarianan cu a haci e lugar limpi, y tambe gradiciendo Monumenten Fonds, cu ta doño di e forno y a conserve manera cu e ta.

Clifford Rosa a señala cu esaki ta un trabao hopi duro y grandi den e añanan pa asina e forno di kalki wordo mira como un monumento industrial proteha, y como e ta un icono, pa Fundacion Rancho ta trece hende local, no turistanan, pa educa nos hobennan y henter comunidad riba e importancia di un monumento industrial, cu ta diferente na e edificionan cu tin den Oranjestad. Pero den e curazon di e ciudad aki e forno di kalki ta un monumento industrial hopi importante.

Pesey e trabao di e fundacion ta pa concientiza continuamente e comunidad riba esaki. El a agrega cu e problematica cu tin den Oranjestad, cu ta wordo pusha un tiki mas den e forno di kalki, ta e problema di adictonan ambulante. Esaki ta un problema cu ta pidiendo atencion, y señor Rosa por a compromete di Stichting Monumenten



Fonds cu tin ya preocupacion pa e vandalismo.


Rosa a señala e problema di vandalismo ta hopi alarmante ki ora cu un monumento ta wordo pinta cu graffiti y algo sosode, ta un situacion fastioso. Pesey Fundacion Rancho ta gradici ainda cu e forno ta den e estado original, cu a wordo conserva.

El a bisa cu danki cu nan a cera e portanan, y hendenan no por drenta mas, e por wordo mantene. Pero e fundacion su so, no por haci tur e trabaonan aki, y pesey ta pidi atencion y colaboracion di otro instancianan cu ta traha cu adictonan pero tambe Gobierno mes, pasobra tabata tin un City Inspector activo den Oranjestad, cu tabata colabora tremendamente, pero awendia no ta tende mucho mas di City Inspector.

Serlimar tambe, cu ki ora cu e fundacion a pidi colaboracion nan ta haye pero ultimamente esaki a zwak un poco, den sentido cu nan a planifica con pa atende cu e parti di sushi, cu tambe ta parti di e vandalismo.

Ademas, Rosa ta menciona DOW cu tambe ta manda su hendenan pa haci limpieza, cual ta e ploegnan cant'i caminda, pero e fundacion ta wak ultimo lunanan hopi discrepancia den con e proceso ey ta canando awo mirando cu Oranjestad ta birando mas sushi y den e area di Rancho tambe ta acumulando hopi mas sushi y e fundacion kier pone atencion na

tur esaki, mirando cu e problema di vandalismo riba e monumentonan ta creciendo y mester atende cu ne. E no ta un problema di Fundacion Rancho so, pa mantene esaki. Nan ta meymey di e curazon di comunidad pero nan so no por soluciona e situacion.




Ministro Geoffrey Wever:

Hopi orguyoso cu Partido RAIZ ta co-firmante di e proyecto di ley pa haci igualdad posible na Aruba

ORANJESTAD (AAN): Dialuna merdia net na entrada di Stadhuis na Playa, Partido RAIZ a duna un presentacion pa splica cu nan semper lo keda defende Derecho Humano. Aunke no ta di acuerdo cu Gobierno a bay cassatie, toch nan sa cu aki ta un pais democratico y e plataforma aki ta acepte.

Ministro Geoffrey Wever di RAIZ, a bisa cu a yama e conferencia di prensa pa reafirma na pueblo e posicion di e Partido, cu nan ta para pa igualdad, ta na favor di igualdad, ta para pa inclusion, y a yega di menciona esaki na varios momento, y nan no a cambia nan posicion.

“Nos ta orguyoso cu Parlamentario Misha Raymond di RAIZ ta co-firmante di e ley iniciativa cu ta bay haci igualdad posible na Aruba. Nos ta orguyoso di e participacion ey, y nos sa cu e plataforma lo vota pro pa e ley aki ora e wordo trata den Sala di Parlamento, y den e sentido ey



2023 lo ta un aña historico pa Aruba. Mi ta kere cu nos como plataforma por ta orguyoso tambe di nos dos Parlamentarianan cu lo vota pa e ley aki, pa haci e posible na Aruba,” Wever a indica.

El a splica cu nan a tende diferente opinion, a comparti nan pensamiento cu organizacionnan den comunidad, y pa na nan ta importante pa reafirma y confirma cu nan ta para pa igualdad.

Cu esey, Partido RAIZ ta mira cu nan lo bay haci un cambio real den e panorama, no solamente e aspecto huridico, pero pa e personanan cu ta biba na Aruba.

E topico aki no ta djis “cassatie” cu un “ley”, pero e aspecto importante ta “personanan”, esta hendenan y nan ta kere cu esey mester hiba bek den e discusion tambe pa ora cu ta papia di e topico, lo papia cu respet pa cada persona.

Ministro Wever a tuma nota cu tin algun grupo cu ta expresando nan mes na un forma no-respetuoso dirigi riba e grupo aki, y esaki ta algo cu nan kier contribui na e causa y corda cu ta trata di hende, di e ser humano, cu tin famia, cu tin amigonan, y nan merece di haya un trato igual, un trato riba nivel, y un trato di respet.